



Minggu, 23 Oktober 2022
Ogen: 1 Timotius 4:7



"Biasakenlah Nggeluh Mehuli"



Kegeluhen i doni megati perhadapkan ku bas dua dampar, e me sehat-sakit; meriah ukur-ceda ate; terang-gelap; bersih-melket; cirem-berjut; tawa-tangis; sukses-gagal; teman-imbang; mehuli- jahat. Tupung kita i bas situasi sehat, meriah ukur, terang, lingkungan bersih, cirem, tawa, usaha sukses, melala teman ras mehuli lagu Langkah tentuna mpeturah ate malem dengen ukur meriah; tapi tupung kita i bas situasi sakit, ceda ate, gelap, lingkungan melket, berjut, tangis, usaha gagal, enterem imbang ras lagu Langkah la mehuli mpeturah ate mesui dengen ukur serbut.

Surat Rasul Paulus man Timotius i bas 1 Timotius 4:7 pe ningetken kerna pengajaren gelah nirangken turi-turin si la tuhu si la erguna dengen lagu langkah si la mehuli. Pengajaren enda i suratken gelah Timotius selaku anak rohani Rasul Paulus (anakku si tuhu-tuhu i bas kiniteken, 1 Tim. 1:2) nggeluh mehuli erkiteken melala pengajaren-pengajaren si papak si seh man perpulungen si elai Timotius. Kiningudaan Timotius banci saja engkuasai dirina si erbahanca ia lanai ietehna sura-sura Dibata i bas ia nggeluhken geluhna.

Perkembangan jaman enda pe banci saja mabai kita selaku moria i tengah-tengah persadaan, selaku nande nandangi anak-anak ras selaku ndehara nandangi perbulungen lanai ndalanken fungsi ras tanggungjabapta bagi arusna. Buena perbeben, baban si mberat rikut pe ras persoalen megati erbahanca kita lupa nandangi persinget ras pengajaren si isehken man banta. Waari enda kita iajuk, 'biasakenlah nggeluh alu mehuli.'